



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 6

Delhi nung BJP-i teladak
excise policy ka benoktsü

Meghalaya: NEHU Pro VC
Sherwin Sungoh-i mapa toktsüogo

VOL. XXII ISSUE NO. 178 (ADOK 178)

DIMAPUR

KÜPTOKNÜ (SATURDAY)

RONGCHII (APRIL) 12, 2025

₹ 5.00

Ozüng ya ajak asoshi kasa asütsüla: RPP

Dimapur, Rongchii/April 11 (TYO): Reny Wilfred-i tim masüba mapa inyakba ken o tem nung UDA sorkar aser 'State Law Enforcement Agencies' temi mapa meinyakba aser ochi obendang agütsütsü tejangraba mesayuba atema kanga jashiba aser süngmangba Rising People's Party (RPP) ajanga sangdong ka nung lemsatepogo.

Nisung kar ola madoki timtema yutsür senior IAS officer ka ajanga POCSO nung aibelenba densema mapa tamajung inyakba tai tonglokja liaka kecha mashi yutsüba, judiciary atalaba aser meyiper dangar tenüing asentsü atema osangbener senden ayongzükbä ya ochi obendang mezügmeshiba inyakyim ka lir.

Iba taoksatsü ken o yagi Nagaland nung obendangba tsütsü systems balala tabu ana temai adoka sayur - ka arok nüburtem asoshi aser ka tesendaktep kanga junga aliba bureaucrats atema. Naga nunger nüburtem tilateri nung aibelenba atemabo özüing indang tashi ajak amshir, saka jenjang tulu nung aliba ketdangsür Reny yabo aibelen balala liaka - 2021 küm POCSO kübok tai tonglokja aliba aser tang mapa inyakdak tesem nung pai tim masüba mapa inyak ta tetsür aikati FIR benoka liaka - tang tashi özüing agi malenteti pa sünütsü süa alir.

Mapa nungi anenja, pua mesüra tapet temerenshi agütsütsü melen Wilfred nem jong tongloktsür, transfer ang

yoker aser yimjak nung system tenüing menükdaktsütsü melar - aser iba maongka ya POCSO kübok tai tonglokja alir "common criminal" temi kodanga mangutsü, ta RPP sangdong ajanga ashi.

POCSO Act ajanga ken o küm ka nung tembangtsü shia lir. Ajisüaka küm asem lir Wilfred ya memerenshi yuja lir. Ibai obendangba nung tamakok aluba kisüing masü, ibai sorkari yaria temerenshi balala nungi kumzüka ayuba maparen lir, ta RPP ajanga ashi.

UDA sorkari rule of law mezügmeshiogo aser state nung sexual violence nungi takum jenbua alirtem dang obendangba ya tashi maiter atema kisüing aser 'protection' ya tashi/sentsü alirtem meyong ta osang sangoktsür.

Reny Wilfred ya tekeratiba nung aputsüla aser ken o matem tashi mapa nungi anenja atatsüla aser 'minor survivors' aser mapa inyaker tetsürtem pai merenshir alir nem ochi obendang tekeraba nung agüjang ta akhanger, ta RPP ajanga ashi.

Ken o nung UDA sorkar shilem lir ta nüburtemi angatetogo. Mapa tamajung inyaker kumzüka yua timtem ajurutem merenshiba yimli nem Nagaland nung aliba nüburtemi tatok magütsütsü. Sorkar mejanga aliba nungi saker tim mapa inyaktsü mapang tongogo. Tetsür temeden wazüka ayutsüla, ta RPP sangdong ajangasa ashi.

Shishilempar kari tim masüba mapa inyakba azüoktsüla: MTLT

Dimapur, Rongchii/April 11 (TYO): Jila nung business enterprises balala kibur shishilempar kari market nung tim masüba mapa inyakba den özüing alema yi shibelenba mapa inyakba osang angazüka kanga aoksar, ta Mokokchung Town Lanur Telongiem (MTLT) ajanga sangdong ka nung ashi.

Mokokchung Police ajanga April 2, 2025 nü Mohan Ram Bhadu meyong truck (registration number NL 02 Q 6311) apuba ajanga iba maparen temai adok, shiba trucks ishika kibur aser hardware stores ana - Anuradha Hardware (Arkong Ward) aser Matsung Hardware (Aolijen, Ungma) lapoka lir.

Police temi iba truck nungi yi aika ngutet, koba hardware oset agi nembanger bena liasü. Iba mapang shishilempar Mohan Ram Bhadu mapa inyaker truck driver Dev Raj aser salesman Mahesh Siyag police temi apu, ta MTLT sangdong ajanga ashi.

Ibaji yutsür Mohan Ram Bhadu yagi shishilempadak osettsüset jenjang özüing alema yanglushiba indang Mokokchung Truck Owners Association (MDTOA) ajanga tejangja puteta osang kaket balala nung adoktsü. MDTOA züingsem Mohan Ram Bhadu yagi truck para tali meshia market rates dang nungi tajemba agi hardware osettem yoka local economy nung kanga mejungi kongshiba maparen MDOTA-i temai adoktsü.

Bhadu yagi 'predatory pricing'

yimya amshiba angazükogo, koba Competition Act, 2002 indang 4(2)(a)(ii) kübok nokdanga aliba maparen ka lir - kong pai hardware oset tejangja jenjang tajemba nung ayoktsü aser yangji takoksa anguba sen ya özüing alema yi ayokba business nungi ajangzüka arur, ta MTLT ajanga ashi.

Yamaji shishilempar Bhadu-i pei atema kisüing bilema inyakba atema MTLT-i khukhua aitsür.

MTLT ya Mokokchung nung stakeholders tejangja ka lir aser onoki local aser non-local business kibur dang tajunglen nungi tokteptsü ajungshia arur. Aser tetsükdaktsü aser tebilemtsü balala liaka Mokokchung jila indang rongsenketzüng ya lenmang shidak nung aor aser terenlok lir ta ajiteter. Ajisüaka Bhadu inyakyim ajanga 'fair market' nung tetsükdaktsü agütsür aser nübur ajungai pa aitsütsüla. Shishilempaba nung ashikülak mapa inyakba yagi mapang talangka timtem agütsütsü aser onoki yimya kecha nunga market manipulation tatok magütsütsü, ta MTLT sangdong ajanga ashi.

Anungji Mokokchung Police ajanga nokdanga aliba temesepba oset apuba atema MTLT-i pelaba lemsateper aser kasa mapang özüing amshirtem dang özüing agi melaba ama tapet mera agitsü ajungshir.

MTLT ajanga Public Prosecutor dang shishilempar Bhadu yagu Competition Act, 2002 indang Section 4(2)(a)(ii)

kübok aibelenä ali asü maliar bushisüingdanga aibelenä lira ken o benoktsü ayongzüker, ta ashi.

Ano Mokokchung Municipal Council danga pei sasep nung bushisüingdanga Bhadu inyaksangshi agi koba tashi teraksa bener aruja aliar asadangtsü ajungshir, ta MTLT sangdong ajanga ashi.

Özüing alema inyaksangshiba tejangja putetra MMC-i pa indang trade license idangjisa meyipa agitsüla aser tapet özüing kübok ochi obendang lenmang bushitsüla. Iba den MTLT ajanga Mokokchung rongsenketzüng tsütsü lokti tentet tulutiba Mokokchung Chambers of Commerce and Industry (MCCI) dang asen jila ainba nung tetsükdaktsü agütsüba iba amala inyakyim mittsü ajungshir.

Talisa Nagaland Liquor Total Prohibition (NLTP) Act tasüa masü, takuma masü ta aliba ajanga Bhadu temenen mapa nung yarisema yi ayokba nungi pa tajangzükbä tulu ngudaktsür aser pa indang shidakba hardware business nung akoksaba aazükdaktsür. Anungji Mokokchung nung aliba nüburtem tenük lapoktsü mapang tongja tongogo aser state sorkari NLTP Act ya süoki ia lepa reprangshitsü mapang tongogo. Kechi südir süaka MTLT-i iba ken o aser local economy kanga junga meita atatsü aser nübur akoksatsüsa tim masüba mapa inyakba tatok magütsütsü, ta MTLT sangdong ajangasa ashi.

Watsü Mungdang 23 buba inti senden takok manung tembangogo



Rev. Dr. Wati Longchar

Mokokchung, 11 April (TYO): Watsü Mungdang 23 buba inti senden "Yakbangsür" omen dak rangloker 10th & 11th April, 2025 anogo ananü yangi Mokokchung Town Hall nung takok ngua agiogo.

April 11, 2025 nü tongti o jembir Rev. Dr. Wati Longchar-i "Telemtetba agiyim nung yakbangsür" onük nung ajemdaker jembidang, Naga nunger loktiliba ajak tebur

telemtetba nung dang odi asüba ka asenoki beshia arur, tetsür nem yimdenyimli nung kodanga shilem magidaktsür, tetsürtemibo yimsüsüba mapa meinyaktettsü ta asüba shisatsü lir, asen shisatsüji tokolak bushiba sobaliba nung dang yangsema lir, ta metetdaktsü.

China lima nungbo pastor mapa ya tetsüri teimba inyakba angur, saka asen lima nungbo tetsür pastor kata mali aser tetsüri

pastor mapa inyaktsübaji mashi mapa ama asenoki bilemer. Iba ama sadangsariba shisatsü ali tashi asen lokti kodanga maintsü, ta pai ashi. 'Sobalibaji kodanga memelenshitsü ta masütsüla, sobalibaji melenshia aotsüla', ta paiza shisem.

Mapang kabo teburtemi noktang yonga mesüra tetsürtemi maginüyonga temelenshiji arutsüba, ta paiza alima balala indang medemdanga aser kuli kar bener arua lemsatep. Temelenshi ka asoshi tasütait nüngdaker aser makoktsü ta bilemba shisatsü nungi adoktsüla, ta paiza tetsürtem tasü aittsü ajungshi.

'Yakbang nung shilem agitsü atemaji luyim balala nung shisatsü peria alitsüla, tangari bushia arutsüsa renema alitsüla', ta paiza ashi. Naga nunger lokti ya tanaben khen reprangshitsüla, kechiyong tebur kisüingi alimaji bener maor. Tetsür-tebur lungjemer aotsüla. Loktiliba ajak teburi dang azüoktsü merangba

inyakyim ya memelenshira asenok tejakleni maotsü, ta paiza melenshidaktsünüba olen ka shisem.

Mokokchung D.C, Thsüvisie Phoji-i tepela o jembidang, Aor Aotsür loktiliba, sobaliba aser tetsürtem nungi tangazüktsü tajung aika aliba nükhshia ashiba den paiza alima tzü mopung menena akümba tebilemtsü kar lemsatepa, asenoki züzüa yutsüra lanu asenortem tali majungtsü, anungji, Tsüngremi moatsüba yimyaliba kechisaren wazüka aser kümzüka ayutsü asoshi tayongzükbä ka agütsü. Asen lima tebilemtsü kechisa lir itemji meteta telangzüba bushitsü merangtsüla, ta metetdaktsü.

Ao Senden tir, Marsanen Imsong-i tayongzükbä o jembidang, tsürabur mapang nungi tetsürji mozü ama amshia aru, oboula nunger Chungliyimti alidang arür den raratsüsa aküm, iba mapang tetsürtemi teburtem tasü itdakja shirnoki tsükchir mangko bener arudir, parnok

nem mangkoteptsü taker abenloktsü, anungji, tetsür olaji atamata masü, tetsür ola ajanga yim wazüka ayuba iba konang nüngsangji tanü Ao sünak abenertemi agia arur, ta ashi.

Tanü alima nung ochi mashi jateta adokba mapang ka lir, item ochi mashi mapa anemaji "ochi" agi dang koktettsü, kechiyong "ochi" ji asenok asoshi takokba tongshi lir, ta pai ashi. Paiza Aor yimli dak amendaker Tsüngrem meteta pei atep nung chirmurtem dang sayubentsü o, sobaliba, awashi, libaliru sayuba den tetsü oshi wazüka beshitsü asoshi Aotsür nem inyakkaktsünüba o kar shia ayongzükbä.

Watsü Mungdang 2025-2028 kümsük anitsü asoshi mendenpur itemi shimogo:
Tir - Wt. Tianaro Jamir (Longsa)
Tatong Tir - Wt. I Tangitla (Asangma)
Tongti Zülur - Wt. Nokinnaro (Mangmetong)
Tatong Zülur - Wt. Wapanginla (Aonokpu)

Akhoya nung Osak aremba indang sayu



Akhoya yimtak Tzumokkong Welfare Society ajanga NEC teyari agia osak nung sü aremba indang shisatokden sentong nung adenerten noksa nung angur(Akhoya, April 10, 2025).

Dimapur, April 11 (TYO) :

Akhi tsüraburtem mapang nungi Akhoya ya osak nung sü aremba mapa nung nüngtugu yim ka lir aser tanüa iba süremba maparen mesamadaktsüi tajungba amshia aotsü asoshi shisalemsatepba sentong ka Tzumokkong Welfare Society ajanga North Eastern Council teyari agia Akhoya aser Tzumokkong ward, Changtongya town nung Rongchii (April) 9 aser 10 nü

agiogo.

Iba sentong nung adenertem dang Akhoya yimtak osak nung sü aremer mongin Wt.Senlitsulai osak tu peta sü aremtsü renemba nungi sürem sü kuma osak nung sü aremba mapatem indang sayua liasü.

Iba sentong akaba indang nükjidong lemsatep dang TWS nung mendenbuba Wb.L.Senti Yangeri ashiba agi, akhidang mapang kabo Ungma, Longsa aser Longkhum yimitem nungi takartem sü aremtsü asoshi

Akhoya nung aruagisa among aser Changkikong nungia sü aremba angazüksü asoshisa aru.

" Osak nung sü aremba ya Aor sobaliba aser senmang tajung rongnung ka lir, anungji iba mapa ya mesamadaktsüi asentenshia tanüa tanü putu den apet tajungba kuma inyakba ajanga sobaliba wazüka ayutsü aser rongsenren nunga ajangzükdaktsütsü nükjidong nung iba sentong ayongzüka agir," ta paisa ashi.

Sematila nung Anaemia Awareness & Screening Camp agiogo

Dimapur, Rongchii/April 11 (TYO): POSHAN Pakhwada 2025 amungba nüngdem nung April 11 nü Sematila Health and Wellness Centre, Dimapur nung Anaemia Awareness aser Screening Camp ka agiogo.

Iba sentong ya District Program Office, Social Welfare aser Department of School Education (DoSE) aser Integrated Ayush Hospital, Dimapur longjemer agia liasü. Mashisa aliba, mama yongdakja aliba tetsütem aser tainlonglong aiür chanutem nem tangazükba agütsütsü nükjidong nung iba sentong ayongzüka agiogo.

Sentong ya lokti pela agizükba o jembiba sülen tenzük aser District POSHAN Coordinator, Dimapur

Limasenla Walling-i o jembia liasü. Lai, POSHAN Abhiyaan campaign kübok nutrition shitak achitsü koda tongtibang indang lemsatepba den lokti-i shilem agitsü nüngdaka lemsatepa liasü.

Integrated Ayush Hospital, Dimapur nung Medical Officer Dr. Sentila Aier-i, anaemia adokdatsüba, temaitsü aser symptom tem indang lemsatep aser iba ya kodaser nokdangtsü iba indang tangazükba agüja liasü. Iron-rich diets achiba, mapangshia health check-up asüba aser iron-folic acid supplementation ajanga iba tashidak ya nokdangtetsü, ta lai ashi.

Sentong nungsa anaemia screening session ka agia liasü.

Ajak senteper nisung 60 screen süogo aser parnok rongnung asem dak mild nungi moderate anaemia puteta liasü. Item nisungtem nem iron aser folic acid tablets agütsü aser sentong nung shilem agirtem nem parnok anogoshia chiyongba nung iron peria aliba chiyongtsütem indang metetdaktsüba densema personalized counseling agüja liasü.

Sentong ya CDPO Dimapur Limasangla-i tepela o jembiba sülen tembang, shibai partner departments aser sentong nung shilem agir ajak dang kanga pelaba lemsatepa liasü. Laisa, shilem agir ajak dang anaemia nokdangtsü koda tongtibang iba indang kinunger aser lokti nem metetdaktsütsü ajungshia liasü.

FAC nung Love Life Liberty Movement sentong agi

Dimapur, Rongchii/April 11 (TYO): Fazl Ali College nung April 11 nü Love Life Liberty sentong ayongzüka agiogo. Sentong nung FAC aser kidanger college temi shilem agia liasü.

Mezüngbuba session nung Fazl Ali College Principal Dr. I. Wati Imchen-i, tejaokertem college-i pelashishia agizük. Paisa, lenla ajak nung liromedema alitsü koda tongtibang iba indang lemsatepba den mental health dak sendakba nung kaketshirtemi tetsükdaktsü ajangshibatem indang lemsatep aser iba sentong ya iba amala tetsükdaktsütem koktettsü atema jenjang tajung ka ta shia kaketshirtem dang peria angazüka shisa takaba akümtsü

ajungshia liasü.

Sentong nungsa Munguli Sangtam-i iba sentong indang metetdakja liasü. Iba sentong ya Tali Angh aser pakinungtsü Jungtina nati tenzükba lir. Lanurtem lenla ajak nung liromedema alitsü atema ajungmesotsü atema iba sentong ya tenzük ta shia pai, koda iba sentong ya taneptsüba ajungkettsü aser taküm nung nükjidong tongteta aotsü atema jenjang agitsü asoshi kanga kümdera yangluba sentong ka lir ta ashi.

Tanabuba session nung Munguli Sangtam lenisüba nung panel talk ka agia liasü. Panel nung Pastor Kevi, Rongsenchila Longchar, Ayim Longchar, Konaei Shongdok aser Temsu Clover nunger densema liasü.

Sensaksem ya parnok tajangshiba, creative endeavours aser kaketshirtem taküm nung jenjang balala dak rangloker agia liasü.

Tasembuba session nung Sashi Wapang, IRS-i, tanü asüng lima nung technology koda renloka aoer iba indang lemsatepba den Nagaland nung rongsenketzüng indang jembia, koba pai ashiba agi centre dak timba metaloker lir aser renloka maoer. Paisa, unemployment indang jembia liasü.

Session pezübuba nung Pastor Visasier Kevichusa-i Tsüngrem o jembia liasü. Session pezübuba nungsa Tali Angh, Jungtina, Ranjana, Temsu Clover, Konaei Shongdok aser Ayim Longchar nungeri shilem agia liasü.

EAC Jalukie-i gari senzügenpong indang metetdaktsü

Dimapur, Rongchii/April 11 (TYO): Upper Jalukie Sector A kübok National Highway 129A nung lenmang atsülangshitsü atema tenem tsüngtokba dak sendakba nung EAC Jalukie, Sizin Rentta-i sangdong ka ajanga temalen shisema aliba lenmang ya April 15 nü tashi shibanga atatsü ta metetdaktsüogo.

National Highway 129A

kecha tetsükdaktsü makai yanglutsü atema lenmang sadema lapoktsütsü aser senzügenpongertema kümzüka toktsütsü atema atakzüka aliba mapang gari khenyongi senzügenpongsü memelatsü, ta metetdaktsüogo.

Rentta-isa, nüburtem dang Jalukie upper nungi Peren jila tashi lenmang tejenba amshia atatsü metetdaktsüogo.

Ao Union Chümoukedima-i aitsür

Dimapur, Rongchii/April 11 (TYO): Maikum yimtsüng nung April 7 nü mejangjaba nisungtemi Chubatemsu kinungtsü asür Kensutlungle tepsetba khu khua aitsür, ta Ao Union Chümoukedima-i sangdong ka ajanga metetdaktsüogo.

Tai maketba taküm ka koda tepseta intok, iba ya rasa ashitsü makoker aser lokti tentettemi agizüktsü makoker. Iba tatalokba ya angazüka Ao Senso Telongjem Chumoukedima, Ao Lanur Telongjem Chumoukedima nati asür kinungertem den nokdaka aruogo aser ketdangsürtemi

aibelenertem mapu tashi maneni takokba tashi teyari agütsütsü.

Ao Senso Telongjem, Watsu Telongjem Chumoukedima aser Ao Lanur Telongjem Chumoukedima nungeri Nagaland Police dak tamang akar aser Kensutlungle tepsettertem takaratiba nung pua temzüng ozüng dak ajemdaker tapet temerenshi agütsütsü mepeshir. Onok maneni asür kinungertem den nokdaka lir aser kasa mapang nung aibelenertem mapu tashi police nem teyari agütsütsü, ta Ao Union Chümoukedima tir-i metedaktsü.

Aadhaar Samvaad sentong nung Nagaland tushi

Dimapur, Rongchii/April 11 (TYO): UIDAI, MeitY, Government of India-i ayongzüka Bharat Mandapam, New Delhi nung April 8 nü Aadhaar Samvaad sentong agiba mapang Nagaland-i tanurtem Mandatory Biometric Updates (MBU) dak sendakba nung mezüngbuba jenjang ngua liasü.

Commissioner of Nagaland, shiba state nung Aadhaar Registrar lir pa den Deputy Commissioners temi anir

tanurtem züngoksemtsü atema inyaka liasü. Iba jenjang agiba ajanga MBU tem aika kümogo.

Registrar for Aadhaar, Nagaland, KS Anden Konyak IAS-i, Deputy Commissioner tem dang parnoki bendanga agüja inyakba atema tenüngsang agütsü, koba ajanga national jenjang nung state tushio. Paisa, parnoki district ajunga nung bendanga agüja nendanga inyakba ajanga iba takok ya ngutetogo, ta ashi.

Longleng DPDB senden menogo

Dimapur, Rongchii/April 11 (TYO): Longleng District Planning & Development Board (DPDB) senden April 11 nü DPDB hall Longleng nung menogo. Iba senden ya Deputy Commissioner aser Vice Chairman DPDB Longleng, W. Manpai Phom lenisüa nung mena liasü.

Sentong nung DC-i lokti pela agizükba o jembia aser iba sülen züngsem tasentem metetpela liasü. District Sports Council Longleng aser Departmental Tournament organising committee tenüng nung DC-i, asayamung asayaba mapang teka amteper inyakba aser nongita yariba atema HoD ajak dang kanga pelaba lemsatepba den district nung saisabong maneni tejakdangi bener aotsü mepeshia liasü.

Senden nung DC-i, NST point nüngja Chinghong aser Pangtok Memorial Point ta jatsütsü atema Hukphang village council-i board dangi abenba metetdaktsü, koba board-i sensak asemba sülen agizüka liasü.

Tzüngluruwa tonga arur

asünung house-i May ita lokti nübutoka merekmeju sentong ka agitsü telemtetba agi, koba talisa jila aser kiyong ajak nung kilentsü merektettsü atema asütsü. House-isa, iba merekmeju sentong achaayangtsü atema committee ka tentettsü telemtetba agi, kong ADC Convener asütsü aser EE R&B, BDO Longleng, EE Urban, DPA DDMA, SDO civil aser Addl SP nungeri achaayanga mapa inyakdaktsütsü.

Maneni senden nung Longleng jila nung gari anenba dak sendakba ken o benoka sensak asem DC-i, SP Longleng dang gari anenba dak sendakba nung mapang tatakzük indang ken o ya asadangtsü nonglokja liasü.

Senden nung Department of Economic and Statistics Longleng-i PowerPoint presentation ka ajanga department inyakyim metetdaktsü. Taruba DPDB senden nung department of Evaluation dang department inyakyim metetdaktsütsü asoshi mendenbubai tetuyuba agütsüogo.



April 11, 2025 nü Chikkamagaluru, Karnataka nung Congress züngsemtemi sorkari petrol totzü aser LPG cylinder jenjang atuba anema longkak aitba noksa nung angur.

Delhi nung BJP-i teladak excise policy ka benoktsü: Rekha Gupta

New Delhi, April 11 (Agencies): Delhi nung BJP sorkari saru jenjang tajungba akümtsü atema kanga teladak excise policy ka benoktsü, ta Chief Minister Rekha Gupta-i metetdaksü.

Interview ka nung jembidang lai, excise policy ji teladak asütsü aser loktliba nung mangatettep kecha madoktsüsa benoktsü, ta metetdaksü.

Taküm February ita nung Delhi assembly election nung BJP-i Aam Aadmi Party sorkar atsüngdoka liasü. AAP sorkar kübok 2021-22 küm excise policy nung ochimashi liasü, ta tai tongloktsüba ajanga AAP

tenüng kanga menüka liasü.

Rekha Gupta-i, "Onoki kanga teladak excise policy ka benoktsü aser ibaji ajanga sorkar saru jenjang tajungba akümtsü. Iba inyakyimji ajanga nübur aser lokti nem timtem kecha magütsütsü. Onoki tanga state tem nung benokba excise policies tajungtiba asadanga benoktsü," ta metetdaksü.

2021 küm November ita nung AAP-i excise policy tejenba melen a excise policy tasenbaji 2021-22 küm nung benoka liasü, ajisüaka mangatettep adokba sülen iba policy anen.

2022 küm July ita nung Delhi Lt Governor V K Saxena-i

excise policy nung ochimashi alibaji bushisüngdangtsü atema CBI nem agütsütsüla, ta benoka liasü. Tesülen iba policy ji 2022 küm August 31 nü agien.

Tang Delhi nung yi ayokba store 700 shi lir aser ibaji sorkar Corporations pezüi achaayanger.

Bodhbarnü Delhi Chief Minister-i Excise Department nung tongti ketdangsertem den senden ka mena excise policy tasen ka benoktsü atema o lemtepa liasü.

Tesülen Chief Minister's Office-i X ajanga, Delhi sorkari kanga teladak excise policy ka benoktsü, ta metetdaksü.

Tamil Nadu election nung BJP aser AIADMK na longjemer tokteptsü

Chennai, April 11 (Agencies): Sangküm Tamil Nadu assembly election nung Bharatiya Janata Party aser All India Anna Dravida Munnetra Kazhagam na longjemer tokteptsü, ta Hokolbarnü parnoki metetdaksüogo.

Union Home Minister Amit Shah-i, AIADMK tongti lenir, Edappadi K Palaniswami leniba nung Tamil Nadu election nung BJP aser AIADMK nati longjemer tokteptsü, ta ashi.

Küm ana tejaklen party ana ya pilaa liasü ajisüaka tang tanaben asentenshir lokteper.

Amit Shah-i, Centre nung Ato kilonser Narendra Modi lenisüba aser state nung Palaniswami lenisüba nung tokteptsü, ta metetdaksü.

Tamil Nadu nung tanga party

tem-a NDA teloktep nungji adentsü.

Hokolbarnü Tamil Nadu nung BJP Tir menden atema Nainar Nagendran shimogo.

Chennai nung osangbenertem den jembidang Amit Shah-i, "AIADMK aser BJP nati sangküm election nung longjemer tokteptsü telemteba agiogo. 1998 küm nungi mapang balala nung AIADMK ya BJP teloktep nung shilem ka liasü. Centre-state tesendaktep atema Ato kilonser Modi aser taoba mapang Chief Minister asür, J Jayalalithaa nati inyaka liasü," ta ashi.

"Edappadi Palaniswami leniba nung onoki state nung sorkar akümtsü," ta pai ashi.

Onük kar nung AIADMK aser BJP na tangatetba balala aliba dak sendakba nung Shah-

i, iba atemaji onoki mener o lemteptsü, aser nüngdakra Common Minimum Programme (CMP) ka renemtsü, ta metetdaksü.

Amit Shah-isa, "Taruba Tamil Nadu elections nung nüburtemi DMK ochimashi, tensa majungba aser tetsürtem anema inyakba kanga bulua akümba nung ajemdaker vote agütsütsü. DMK sorkar kübok excise policy ochimashi, lisem ayaba ochimashi, energy ochimashi, ELCOT ochimashi, transport oshimashi aser senotsü nung ochimashi lir. Ochimashi aika atema DMK-i Tamil Nadu nung nüburtem nem telangzüba agütsütsüla. Tamil Nadu nung nüburtemi Udhayanidhi aser Stalin na dang nungi telangzüba aginer," ta ashi.



April 11, 2025 nü Kolkata nung Aliah University nung kaketshirtemi Waqf (Amendment) Bill 2025 anema longkak aitba noksa nung angur.

Atsüapong tendangertem nem temerenshi agütsütsü: Nayab Saini

Gurugram, Rongchii/April 11 (Agencies): Haryana state nung tanur no-menden nung lia atsüapong tendangba aser tetsür süra raksa-a indokba kanga bulua ataloker, ta report ka sangdongba sülen Hokolbarnü Haryana Chief Minister, Nayab Saini-i, tanur tebok nung lia atsüapong tendangertem nem temerenshi tulu agütsütsü, ta metetdaksü.

Paisa, item ama tatalokba mita reprangtsü atema special task force ka tentetogo, ta ashi.

Ajisüaka Chief Minister-i, state nung jelia atsüapong tendangba tatalokba kanga ajema kümogo; 2024 küm tetenzüklen state nung atsüapong ratio mejungi liasü, ajisüaka tang tajungba kümдар, ta metetdaksü.

"Tangbo atsüapong tendangba kanga ajema kümogo. Iba ama ozüng alema tim masüba inyakterem nem temerenshi tulu agütsür. Haryana nung Ato kilonseri sangdongba shidak benoka inyaker. Atsüapong tendangertem dang tai matoktsü," ta pai metetdaksü.

Haryana nung atsüapong tendangba aser tanur raksa-a indokba nokdangtsü atema

special task force ka tentetogo, ta pai metetdaksü.

Tawa 'Vanishing Daughters' ta ser report ka ajanga Haryana nung tanur tebok nung lia tetsür süra raksaa indoktsüba network tulu lir, ta sangdonga liasü.

2024 küm kija nung Haryana nung tanur 5,16,402 aso ajisüaka kinü tanur tetsürbo shilem 47.64 dang liasü. 2019 küm Haryana nung atsüapong ratio ji tebur 1,000 shia tetsür 923 liasü, ajisüaka 2024 küm nungbo tebur 1,000 shia nungi tetsür 910 dang kümogo.

Haryana state sorkarisa ozüng alema lapokba abortion centres mita aoer.

Tawa Haryana Additional Chief Secretary for Health, Sudhir Rajpal-i State Task Force ka tentetogo aser STF jagi Pre-Conception and Pre-Natal Diagnostic Techniques (PCPNDT) Act sashia benoktsü.

State nung Medical Termination of Pregnancy (MTP) centre 1,500 nungi centre 300 bo anentsüogo, ta ketdangsertemi metetdaksü.

MTP centre 23 nem show-cause notice agütsüogo aser online ajanga MTP kits ayokba atema FIR 17 benokogo.

Sorkari Bihar election mapang Tahawwur Rana südaktsütsü: Sanjay Raut



New Delhi, April 11 (Agencies): Hokolbarnü Shiv Sena (UBT) lenir Sanjay Raut-i 2008 küm Mumbai amakba ken o nung tai tonglokja alisang, Tahawwur Rana United States nungi India-i anir aruba atema pelaba lemsatop.

Ajisüaka pai, Centre nung BJP-i aniba sorkari iba onük nung tenüng tajung agitsü merangtsü mesüra election nung tajangzüik angutsü atema inyaktü, ta ashi.

Raut-i, Pakistan nung amenoka aliba kiralongrar teloktem den tesendaktep alir Rana ama kiralongrar ka anir arubaji bushisüngdangba agencies aser sorkar atema takok tuluka lir, ajisüaka iba onük nung ya yimtenren maitdaksütsüla aser ya kar tajangzüik angutsü atema mamshitsüla, ta ashi.

"Iba ya Mumbai amakba nung shilem agir kiralongrar ka lir. Pa US nungi India-i anir arubaji India atema takok tuluka lir, aser iba atemaji onoki asen agencies aser India sorkar dang

pelar. Ajisüaka BJP yimya ni maginer- pa anema ken o akatsü atema pa yagi anir aru asü tenüng tajung agitsü atema anir aru?" ta Raut-i ashi.

Paisa, "Rana anema ken o ya yashi tenzükbä masü. 2009 küm nungi India-i pa anema inyaker. Tesülen taoba mapang Foreign Minister Salman Khurshid densema ketdangsertemi US ketdangsertem den aiben o lemtepa liasü. Küm aika meranga inyakba sülen 2025 küm nung asenoki pa anir arutetogo," ta ashi.

Raut-isa, Bihar election jakdang yimtenren tsütsü tajangzüik angutsü atema sorkari Rana anema tekeraba nung ken o akatsüa akok, ta ashi.

"Onoki asen agencies aser judiciary dak tamang akar, ajisüaka Bihar elections matongdang parnoki Rana alenseta südaktsütsüa akok, aser linük tesem ajaklen yimtenren tsütsü tajangzüik angutsü atema amshitsüa akok," ta paisa ashi.



TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGCHII 12, 2025

Kaket züluba aser azüngba

Tang Watsü Mungdang lokti senden nung jembitsü shimtetba onük 'Kenozülu nung Yakpangsür' ta asüba ya Aotsürtem dang Aortem ajak asentenshitsü nüngdakba tesem ka reprangteta jembitsü tenzükogo ta pelaa bilemer. Atangji, kenozülu nung asentenshitsü nüngdakbaji Aotsürtem dang nungibo ano Aor teburtemang tenügdakba, kechiyong tanü Naga lima nung mezüng azüng zülü sayur kin to mazüng mashir kin ama kuma odagi. Ibaji asenok Aotsür Aortem kaket azüngtsü aser zülutsü nung azümesen kumadokba ajanga lir. Akhidang tsürabur mapangbo kaket züngnyonga asen oshi nung adokba kaket ajak agi Laishiba dang liasü, ajia Laishiba ajak masü tejen aser tasen lai nungi tapu kar dang America nungi aruba Tsüngrem tenzükur Dr.Clark aser pa kinungtsü Mary Mead nati yaria zülubatem dang liasü. Item kakettejji kaketreju nung dena zünga atadang, asen tsüraburtemi Tejen aser Tasen Laishiba ajak meyipa adoktet aser iba den külemi joko asenok kin nungi tashitemeteterem adoka kaketreju nung azüngtsü kaket zülü tenzük aser kaket karbo English nungi Aoi meyip. Ajisüaka, iba mapang tashia asenok Aotsür Aortem rongnungi English agi züluba kaket angateta züngteter aikabo mali asü. Ibaji dang masü saka kaket züngnüaka anüngdangbo mapa agi mapanga mangu aser aonunga tanü ama electricity mali, anungji kar kerosene atsükba milen nung, ano karbo kumbok milen nung aser ano karbo ita asüng ataa lir itaya nung dang Ao Laishiba aser kaketreju nung azüngtsü adokba kaket ishiakaji aiben züngtemasa azüng aser itemji temulung nung koka ayu. Aji oda, Aotsür Aortem rongnung kaket azüngtsü jangrabaji tulu liasü. Iba jagi shisa arenba aser tashitemetet nung Naga nunger rongnung Aor yakpang aküm. Iba jagi Aotsür Aortemi Naga yimten, lokti aser arogo nung lenisüba tajung agütsütet aser tensa mapang majung danga yimjung yanglutsürtemji Aotsür Aortem liasü. Aji oda, Nagaland nung Naga nunger tasadang katibo Ao oshi nung adokba Laishiba aser kakettejji azüng aser ken a Ao oshi nung adokba Ao ken kaket nungi dang aten. Iba jagi Aotsür Aor dang masü saka Ao oshi ya Naga nunger nem tashitemetet aser tangatetba agütsüba oshi aküm. Ibayongji, tangartemia Ao oshi sapua jembia aser Ao oshi jembirtem akhümtsübu, kechiyong Ao oshi jembirtemji Tsüngrem nisung, tesayur aser temeim aketba ochishir nisungtem liasü. Tanübo, tangari dang masü saka asenokia aikati asen tetsü oshi mesapui kumogo aser kaket azüngtsü aser zülutsübjabo yutsür tejembitsüa nümamedangteti kumogo. Ibaji asenok dak shitakba tangatetba maliba ajanga lir. Asenok aikati pei tetsü oshi mashi ser English dang jembibaji tashitemetet aser jenjang tuluka ajangzüktet amai bilemer, ajisüaka pei tetsü oshi amadoker tangar oshi dang jembibaji asen ki yutsür nemzüa senzür amai bilemtsüla. Aji oda, Aori Ao mashi ser English dang jembia senzübaji English nungertemi menütsütsü, kechiyong parnok asoshi pei tetsü oshi mejembitetbaji sobaliba memetet aser pei tetsü taso lima memeimba nisung lir. Ibaji kodang asenoki angatetdir asenoki asen oshijiang ojala aser obala ta angatetsü aser asenoki asen oshi nung adokba kakettejji züngnütsü. Tanübo asenoki asen oshi nung adokba kakettejji dang masü saka kecha kaketa mazünger, anungji asenok shisatsü mainer, iba jagi tangar memeneper. Joko, tetsütema aika mobile amshitsübo mapang angur saka kaket azüngtsübo mapang mangur ta asüba takümtem kuma odagi. Atangji, shisatsü ya Tsüngremi agütsür saka item shisatsütem teimbaka kaket azüngba nungi angur, anungji kaket mezünga asenok kolok aser temulungjangji tazüng aser tap akümer. Talisa, asenoki tanurtem dang kaket azüngtsü ajungshir saka parnoki asenok kokdanga kaket zünga mangur. Aji oda, tanurtem asoshi asenoki tebang agi kechi ashir ta asübjaji masü saka kechi inyaka sayur ta asübjaji tongtibang lir. Itemji bilemdanga, asenoka tanübo kaket azüngba sobaliba dangi meyiptsü kanga rongdak nüngdaka kumogo. Aji oda, kaket züngnü nung dang kaket zülutetsü aser kaket keno nung jangraba kin aser nisungji nübortem asoshi teyari angudak tesem kuma temoatsü nung alitsü.

OLEMSABANG

Molungkimong Literature Board-i züluba: Osemlok

Rev. Tamsü Imchen

(Yashi adok nungi...)

Item kulitem ajanga 1876 October nung Dr. Clark den tamangertemi Molungyimsen yim kümer Dekahaimong (Molungkimong) yimdak arogo aser tamanger toktsüba kuli mali. Kechiyong Imnameri aser Imnanoknen nungerji 1872 kum Molungkimong yimdak tzüsenertem saka parnok Molungyimsen-i aйдang parnok tenüng transfer asüba record nung mali.Saka Dekahaimong (Molungkimong) arogo ka 1892 nung tenzükdangjibo parnok tenüngji Molungyimsen arogo nungi ang bener (transfer) tugu. Iba jagi Dekahaimong (Molungkimong) yimdak Dr. Clark den tamangertem yim tasen akümi aodangji record nung shia aliba ama tamanger ajak ao nungji parnok tenüngji transfer bener aoba record nung zülüja mali. Ano Molungkimong Literature Board-ia Olemsabang nung züluba nung shia aliba ama yim tasen akümdang par yimdak nungi arogo register bener ao nungji tamanger kata meyutsüba kuli ibaji jagi tali jangjashitsür .

The Baptist Missionary Magazine for February 1908

SAMAR WHO BECAME A PREACHER

"....Samar has been for some years pastor of the church at Molung village- the first church organized in all that mountain region..." - Mrs. E.W. Clark.

American missionary temi Naga lima nung Osangtajung bener arua Khristar Arogo yangerba indang record aika yuja aliba nungi temalen agüja aliba record kar ajanga Naga lima nung mezüng Naga Church lipok otsü kanga junga jangjatsür. Ajisüaka, Aortem tia maka tanü arogo lipok otsü jembidang "record mereprangtsü mesüra mezüng missionary temjia asenok ama meimchir dang liasü taji parnoki tiyazü mesüra aibelena zülüja alitsü" ta shia Naga Church putiotsü yanglushitsü merangba angudang tim masü-a ta ola adoktsüsa akümer. Kechiyong iba otsü ya Molungkimong nunger mesüra Molungyimsen nunger indang dang masü saka Naga nunger aser talisa Aor indang arok otsü lir, anungji record nung aliba ama metongmetonga ayutsüla. Tarutsü anogotem Naga Church indang record tasen kar ngutetra idangji tang aliba record tem den medemdanga temelenshitsü lira teim agi melenshitsü akok, saka record tasen kar mengutet tashibo tang kechi nguteta lir iba ya Naga Church putiotsü tamendakdak asütsüla aser kija/telok shingaia iba otsü meyanglushitsüla.

Nisung kari Supongmeren baptiogo ta zülur saka kodang Naga Hills Church register ji repringdir yangjibo Aor rongnung mezüng tzüsenbaji Merangkong nunger Longjanglepzük aser iba sülen jibo Dekahaimong nunger 9 Sibsagor aser nisung 15 Dekahaimong yimdak tzüsenba indang dang zülua lir. Iba register nung Supongmeren tzüsenba kecha nunga zülua mali anungji pa tzüsenogo ta jembibaji amangtsü makaba aser record nung maliba oren ka lir.

Naga limai Khrista yimsü arur küm 150 tema süia arur aser mezüng tenzükba arogo indang missionary record US nung oa Atlanta archive nung yua lir. Ano America nung university tongtipang aika nung iba otsü yua aliba tanü lanurtemi bushia züngdagi. Naga nunger ajaki Dr. Clark aser mezüng missionary tem report amshia kaket züludang asen Ao kini parnok indang report ama masü zülua jembirabangla, ibaji asenok asoshi maaksü aser Tsüngrem nungia asenok temoatsü mangutsü. Asen Aortem tazüngba aser tangatetba nung tangar menepba kumogo. Ao Mungdang aser Ao Arogotem tangar dang nungi tashi taitba kuma renlok-ogo. Ao Arogo tenzükba otsü-ren nung tang kechi teimtemsa adoka lir itemya asenoki bentetta meyura asenok tashi mait dang ajangzüksü aser iba yagi asen Aor tia aser jenjang sayur.ABAM leniba kübok Special Research Committeetem shimteta arudagi: ano maneni temalen zülua aliba otsüren nung kechisa khuret tem (issues, problems) atoka lir, jokorla Research Scholar temi anir Critical Research Discipline nung aotsü asoshi lenmangtem sadema lapokdaksütsü nungdaker.

Nisung kar, yimtsüng kari amokmerena jembia-zülüaka ABAM nung inyakertemi anir Aortemi koba Dr. Clark-i küm 150 tejakdang inyaka yutsüba zülua yuja lir iba jibo memelenshitsüla; saka akok tashi telok balala temolung meyirudaktsüi ajaki hau ta shitetsüsa telemtetba tem (solutions) bushitsü merangtsüla. Iba yong jiang asenok Tsüngrem nungi temoatsü angutsü aser Clark o mezüng missionary temi inyakba mapatem asenoki kumzüka yutsüdi ta yangji kü o atemer.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

April 19 nü Mexico City nung 'March for Jesus' sentong agitsü



Yaküm Mexico nung 'March for Jesus' sentong nung tangokba noksa nung angur.

April 10, 2025: April 19, 2025 nü Mexico City nung küm shia ayongzüka agiba 'March for Jesus' sentong agitsü, aser iba sentong nungji Khristan meyrjang aikati shilem agitsü imlar.

Mexico nung Khristantemi iba sentong ya taküm agi küm 30buba agitsü.

March for Jesus sentong nung Khristantemi yimdong süa jajatsü, tsüngsangtsü, kentenba sentong agitsü aser Tsüngrem O jembitsü. Iba sentong ya ajanga lokti aliba tesemtem nung evangelical Khristantem longjemer Yisu osangtajung sangdonger.

Mexico nung tamalenbo iba sentong dang 'Marcha de Gloria' ta aja. Iba sentong ya Dr. Carlos Quiroa leniba nungsa agia aruogo, ajisüaka tangbo par jabaso, Pablo Quiroa leniba nung iba sentong ketdangsüa agir.

"Tang linük nung tensa mejungi aliba den külemi aika terata nung aliba mapang ka nung Mexico nungger aika atema 'March for Jesus' sentong ya taneptsüba mozü ka amai asütsü," ta osangbenertem senden ka nung Pablo Quiroa-i ashi.

"Küm 30 tejaklen, Mexico nungger 10 shia nungi kati Yisu osang anganüa liasü. Tangbo Mexico nungger 10 shia nungi 8-i Yisu indang metetner," ta paisa metetdaksü.

Mexico nung tamalenbo iba sentong dang 'March of Glory March for Jesus' ta aja.

Quiroa-i, tang linük nung tayongzüka aika lir, ajisüaka aikati odiodia tanela jenjang yanglushitsü jangrar, ta ashi.

"Tang Mexico nung tensa tamajung ajangshidar, ajisüaka kodanga majangshidangba ama sayutsüngitsü atema maongka angutsü ni imlar. Mexico

kümzüksü atema Khristantemi inyaksü. Linük ano mesama, saka teimla lir, kechiyong Arogo taküm lir aser onoki maneni inyaksü," ta paisa metetdaksü.

Mexico nung meimchir temeden dak sendakba timtem aika lir, tesem-tesem nung rara lir aser nisung aika samar.

Human Rights Watch-i ashiba agi, 2024 küm September ita tashi nung Mexico nung nisung 115,000 dak tali samaogo.

Meimchir temeden atema inyaktertem aser ketdangsertemia tasü mang aremba leper 5,000 jungnüa ngutetogo.

Linük nung taneptsüba kanga nüngdakba mapang ka nung March for Jesus sentong ayongzükertemi Khristan denominations ajak longjemer teimla agütsütsü aser tamang jenjang aintsü atema inyaksü.

Pakistan nung nisung anati Tenla ki rongdoktsütsü merang



Bethaniya Pentecost Arogo Tenla kidang teindangba sü ronger aliba noksa nung angur.

April 11, 2025: Honibar (April 5) aonung Pakistan nung mejangjaba nisung anati Tenla ki ka rongdoktsütsü merang, ajisüaka pastor-i nokdangteta liasü.

Pakistan nung Punjab Province kübok Kasur District nung aliba Bethaniya Pentecost Arogo nung pastor, Tanveer Boota-i, pa ayaterm nung amoi aotsü lia Tenla ki hall nung pai ola kar angashi, ta metetdaksü.

"Tenla ki hall nung light tsükloka aliba agi ni kishiji lapok. Ni nisung ana tejak meybanger angu, aser tena rongnung kati teindangba sü nung mi senoktsü. Ni parnok dak asaloktsüdang parnok jena ao," ta pastor-i

metetdaksü.

Pastor Boota teno, Usman Boota-a olaji angashir saak aser tenati miji ensepa liasü. Iba sülen tenati police aja.

"Police team ka aruba sülen bushisüngdangba mapang nung kerosene totzü pongdang ka den süng ka nung sü meyr angu. Parnoki ibaji amshia Tenla kidang mi senloksü," ta pastor Boota-isa metetdaksü.

"Shingaia ni mesüra Arogo amokmeren masü, aser kiyong nung yimsü dak sendakba timtem kecha maliasü. Kiyong nungsa ano Pentecost Tenla ki pezü aser Catholic Tenla ki ka lir. Onok aliba tesem nung Khristan kibong 500 shi lir.

Muslim nungger kiyongertemi onok nem kodanga timtem magütsü. Ajisüaka tang onok Tenla ki rongdoktsütsü merangba ya ni mangateter," ta pastor-isa metetdaksü.

Bethaniya Arogo ya küm ana tejaklen Khristan kibong 16-i tenzüka liasü.

Iba tatalokba sülen Arogoi mejangjaba nisungtem anema FIR ka benokogo.

Küm ti tejaklen Boota-i ministry tenzüka liasü aser par kimong nung Tenla kiji asü.

"Tsüngremi onok Tenla ki mi nungi kümzüka atema onoki Tsüngrem nem tenüngsang agütsür. Aibelenertem aputsü, ta onoki ketdangertem dak melung alemer," ta pai ashi.

2023 küm November ita nunga Punjab Province yimtiba, Lahore nung mejangjaba nisung kari Presbyterian Tenla ki ka rongdokja liasü.

Mezüngbo tangar dak melung melemi liasü, ajisüaka police-i bushisüngdangba ajanga Arogo nung züngsem kati iba Tenla kidangji mi senoktsü ta bushiteta liasü. Iba nisungba jagi Arogo nung pastor inyaknüa liasü.

ANOGO ABEN TSÜNGREM DEN

Pa tepela asenok senmang

Saka shiri ne dak temulung alemer, parnok ajak peladakjang. (T.Ken 5:11)

Chichiba tepela metettsü jangrabaji ajaki aginüba senmang lir. Kechiaser ken atema tepelaji teti asoshi tepela ama aseni aibelena angatetter. Anaji kasa masü.

Tejangraba tepelaji mapang tatsüka asoshi, aser rematoker. Ibai meimchir tebilemba nung ken jangratema junga bilemdaktsüba ka dang lir. Chiyungtsü tajungi jangratemdaktsür. Yamaji tepur tajung ken noksa tajung agi ken atema peladaktsür.

Jangratemtsüji tenük agi anguba osettem aser mapatem lir, tepelaji tanelaren den sentaktepa lir. Chiyungtsü tajung kati jangratemdaktsür. Tepelaji Tsüngremi dang agütsütsü akok. Tepela metettsü jangrartem asoshi tenüngsang ken züluri lenmang kar tuyur. Sarasadema Tsüngrem dangi oang aser chichiba tepela asoshi mepishiang, pai agütsütsü. Ajakji liaka, asenok pa chirtem lir, anungji pa tepelaji asenok senmanger lir.

Chichiba tepela tejangraba shisatsü keter na yanglu. Nai iba tepela asoshi shisadanga lir ma?

Plateau state nung Fulani teloki Khristan 28 tepset

April 11, 2025: Tesüiba ita ka tsüngda Fulani kiralongrartemi Nigeria kübok Plateau state nung Khristan 28 tepsetogo.

April 7 nü Plateau state kübok Bassa County nung Fulani teloki Hwrra yim amakdang Khristan asem tepset. Iba jakdang Fulani teloki Hukke yim-a amak saka Khristantem tasü nungi jenbua liasü," ta lanur lenir, Joseph Chudu Yonkpa-i metetdaksü.

"Tesüiba hopta pezü tsüngda Fulani teloki amakdang Khristan aika tepsetogo. April 2 nü Fulani teloki Nzharuvo nung Khristan ana tepset. March 24 nü Fulani teloki Twin Hill nung arrshi küm 33 Dumba Yohanna tepset," ta Yonkpa-i metetdaksü.

March 23 nü Fulani teloki Dundu yim amakdang nisung asem tepset aser March 13 nüa Fulani teloki Yhwiba yimdak Khristan ka tepset aser ka mejungi yirutsü.

Yonkpa-i sorkar ketdangsertem aser security agency tem dang aibelenertem aputsü aser Khristantem tepsetba nokdangtsü takhangba agütsü.

Iba area nungi cyber security mongin, Ruth Ki-i, 2001 küm nungi tenzüka tanü tashi nung Bassa County nung Khristan 1,107 tepsetogo, Khristantem 2,866 ben amak

asir Khristantem meyong alu 27,330 raksatsüogo, ta metetdaksü.

Plateau state kübok Barkin Ladi, Mangu, Riyom aser Bokkos counties nunga Khristan aika tepsetogo.

Ruth-i, "Tesüiba küm 20 tsüngda kechiba security sepaitemi item ama tatalokbatem menokdangteter. National security agencies indang intelligence aser inyakyim nung metokmeperi ali asü?" ta asüngdang.

Taoba ita Bokkos county nunga Fulani teloki tatalokba asem nung Khristan 19 tepseta liasü. March 28 nü Fulani teloki iba county kübok Ruwi yimdak mangyimba kibong ka semdangir Khristan 10 tepseta liasü.

Iba tesem nungji pastor, Rev. Charles Musa-i, "Bokkos Local Government aser Mangu Local Government-i tesüiba küm ka ser tesadang tsüngda sepai aika yoka lir. Plateau state sorkari meranga inyaker ajisüaka ozüng alema inyaktertem menokdangteter. Ajisüaka Nigeria federal sorkaribo nüburtem timtem sendoker," ta metetdaksü.

Pastor-isa, hopta shia amai alu nung Khristan kabosa tepseter, Khristantem amaker mesüra puer aoer, ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Temekang

(n) mepuyang, tzü temelem (thick liquid)


* Anepdang shia ni tejem temekang marok ka ajemer.

Temeküp

(n) temang nung tepi aser temola na tsüngda tesülen (back of knee)

* Temeküp telonglen tezü tulu ana lir.

OLONG PAITEP # 7120



TIPIEN

1. Zülua aliba metetsü merang - (5)
3. Senyur - (5)
6. Meji - (4)
7. Temaitsü - (5)
9. T ____ maka - (4)
11. Tanidaker - (7)
12. Tekong sobutsü - (4)
13. Naro ka - (5)
14. Ibai - (4)
15. Nashi chiyimdak - (5)
16. Magima - (5)

LANGTSÜNGLEN

1. Tetsür tsüngda jatepba - (7)
2. Tai inyakogo ta metetdaksü
4. Temenen - (6)
5. Taleptsü yin - (3)
8. O jembiba yimya - (3)
9. Anü alulen - (7)
10. Shibang - (7)
11. Tajatsü tim - (6)
14. A ____ ten - (3)

OLONG PAITEP # 7119 TELANGZÜBA

TIPIEN :

1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

NAI-A YA METETTER MA



Brehostibarnü IPL nung Delhi Capitals den asayaba mapang RCB opener, Virat Kohli-i ball 14 nung run 22 yanglu aser otsü tasen ka yangluogo. Iba asaya nung pia six ana aser four ka züka liasü. Virat Kohli ya IPL nung boundary 1000 azükba mezüngbuba asayar kümogo. Pai iba T20 league nung boundary 1001 züker lir. Kohli-i tang tashi nung four 721 aser six 280 züker lir. Pa sülen tanabuba jenjang nung Shikhar Dhawan aser tasembuba nung David Warner lir. Dhawan-i boundary 920 aser Warner-i boundary 899 züker lir.

Meghalaya: NEHU Pro VC Sherwin Sungoh-i mapa toktsüogo

Shillong, Rongchii/April 11 (Agencies): Prof Sherwin M Sungoh-i anogo 19 dang lir North-Eastern Hill University (NEHU) indang Pro Vice Chancellor mapa toktsüogo.

Lai ashiba agi, ketdangsürtem peria maliba aser la kanga nongshiba ajanga mapa toktsütsüsa aküm.

Arpil 9 nü benokba resignation shiti nung Sungoh-i ashiba agi, "pressure nung Pro Vice-Chancellor ama inyaksangshitsü kü atema kanga tasak liasü."

Tesayur aser kaketshir lokti tentetemi university indang administration melenshitsü atema akhangba ajanga mesüngjemteti aliba mapang ka nung tang lai mapa toktsüogo.

Sungoh-i, la mapa inyaksü atema tetsükdaksü aika ajangshiba indang lemsatap, kong Vice Chancellor Prof Prabha Shankar Shukla university headquarters nung maliba aser financial aser



administrative tashi peria maliba densema lir.

Laisa, iba amala tetsükdaksütem ajanga university anogoshia inyakyim takok ngua achaayangtsü tasaka kümdaksür, ta ashi.

Pro Vice Chancellor mapa nungi atsünginaka Sungoh-i maneni Acting Vice Chancellor ama inyaksü, kechiyong la professor tem rongnung tejentiba lir.

Lai mapa toktsüba ajanga university inyakyim dak sendakba nung süoki ia bilemba tali kümdaksüogo, talisa School Board recommendations

bangdaka aliba aser academic session tasenba atema kaketshirtem admission tenzüksü lir asü nung tongtibang telemterbatem agitsü lir.

Kasa mapang nung Sungoh, memonu dangsa tang tebilemtsü adoker alibatam angatettepba bentettsü nüngdaker, ta ashi.

Maneni NEHU ya okadak ken o bangdaker aliba ajanga timtemdar aser iba den ano affiliation ken o aser academic ken o aika agi timtemdar aser iba ajanga lenir tejangja aser administrative tetuyuba tejangja nüngdakba sayur.

Imphal airport anasa ano grenade ka ngutet



aritepa oa liasü. Anepdang 8 ako tashi nungbo grenade ya defuse sütsü aser Imphal West kübok Lamphel Game Village nung intoka liasü.

Iba dak sendakba nung police ken o ka benokogo aser kechi nükjiding nung amokmeren aser shibai grenade ya toktsü aji jangjatsü atema bushisüngdang tesüdak lir.

Brahmapur Guruaribam Leikai, Imphal East nung RIMS Hospital Director Dr Sunilkumar'er kidang grenade ka mereploktsüba sülen tang iba ya atalokogo. Mejangjaba nisungtemi Dr. Sunilkumar'er kidang grenade ka mereploktsü, koba kija aser lokti tentet aikati aitsüogo.

Tertsür lokti tentet; Meira Paibis puri grenade ajanga amokmerenba aija Brehostibarnü Guruaribam Leikai nung mener longkak aita liasü. Parnoki ken o tem ajak yimjung nung sensaksem ajanga bentettsü ayongzüka liasü.

Imphal, Rongchii/April 11 (Agencies): Imphal nung International Imphal Airport anasa political activist Haobijam Gitajen'er kima Hokolbar anepdang hand grenade ka nguteta liasü.

Police-i ashiba agi, grenade den külemi shiti ka ngutetogo, kong "The last warning - G" ta

zülur liasü.

Grenade ya süsüpongertemi anepdang 6 ako meta Imphal West district kübok Awang Leikai tesem nung Gitajen'er ki kima kishi jakdang nguteta liasü.

Osang angazükba sülen Police team ka aser bomb disposal squad densema ketdangsürtem iba tesemi

Meghalaya nung Hungary nunger alima penzür ka sür lia ngutetogo

Shillong, Rongchii/April 11 (Agencies): Meghalaya police-i Brehostibarnü Meghalaya kübok East Khasi Hills district nung Hungary nunger alima penzür ka tasü mang tera shir lia ngutetogo. Pa ya March 29 nü nungi samara bushia liasü, ta ketdangsür kati Hokolbarnü metetdaksü.

Ketdangsürtemi ashiba agi, police-i Hungary nunger alima penzür Zolt Puskas tasü mang ya Meghalaya nung Cherrapunji kübok Shella nung Tyrna-i aoba lenmang nung Ramdait yimtsüng anasa tera shir lia nguteta liasü.

Ketdangsürtemi ashiba agi, pa alanga asü asütsü akok.

March 29 nü Hungarian Embassy-i local police nem osang agütsüba sülen Zolt Puska samaba Meghalaya police-i jangja aküm, ta ketdangsüri ashi.

Pa samaba osang agütsüba sülen Meghalaya Police-i April 2 nü FIR ka benoka liasü.

FIR benokba sülen Meghalaya police den Home Guards, State Disaster Response Force (SDRF) aser local volunteer temi April 2 nü Zsolt Puskas bushitsü atema meita aoba sentong ka tenzüka liasü, ta ketdangsürisa ashi.

Police-i bushisüngdangba sülen Puskas ya March 29 nü Shillong kübok Laitumkhrach nung hotel ka nung anenzükba nguteta liasü.

Kasa anepdang pa 9 ako nung hotel toktsü aser local taxi ka nung Sohra jila-i ao, ta bushisüngdang ajanga ngutetogo. Taxi yagi Puskas ya Mawsahew yimtsüng nung toktsü aser idak nungjagi pa kija Mawkawir ajanga Nongriat leni ao asütsü ta bilemer.

Tia maka ketdangsürtemi Ramdait temeket nung arem ka nung pa tasü mangang nguteta liasü, ta ketdangsür yagisa shisem.

MENUNGRASETER



Asür Jabaso **Rongsenmongba Ao**
21st May 2007 - 12th April 2024

Kodanga amatsü makokba ozü temeim jabaso Rongsenmong, Na asen tebu Tsüngremi Kotaki anir orr tanü küm Ka renteta arur. Saka Na akümlî tatsü ka alidang Ne ajemalu tarenzük menürem jakla tajungtem onok mulung nung teti alir aser nüklai arur tanü iba anogo onoki Na Kangasa menungra Sarasadema amonger. Kenü anogo asenok ajak Na alidak Kotak nungji ajurutsü onok Tamang Sarasadem.

~ **Nu Temeim Oja, Oba, Neyi, Netinunger aser Kinungertem.**

ALI TAYOKTSÜ LIR

1. 3 Pura. Foothill road tangshia 150 per sq.ft

2. Foothill anasa teak lu, 120 per sq.ft

3. Showuba fly over anasa 190 / 250 / 310 per sq.ft

~ Contact : 9863826159

UN-i Myanmar nungyimsü asüba mitkartem aitsür

Naypyidaw, Rongchii/April 11 (Agencies): Taoba ita menoknok tesashi anokba ajanga yimden timsüsür anemba telok balalai civil war nung khen atema rara anena atatsü sangdongba nung Myanmar yimsü asüba mitkari aibelener ta United Nations rights office ajanga aitsür.

Lendong ajurur aliba tesemtem nung humanitarian aid tongtsütsü asoshi rangloker inyaksüba mapang ka nung mitkar temi armed resistance telok dak amaker, ta UN High Commissioner for Human Rights odongtar Ravina Shamdasani-i Hokulbarnü ashi.

Myanmar nung March 28 nü menoknok anoka nisung 3,600 dak tema takum samaba sülen sangdongba ceasefire ya April 22 tashi alitsüba liasü.

Senior General Min Aung Hlaing'er mitkari tashiyim amshia 2021 küm Aung San Suu Kyi-i aniba civilian sorkari atsüngdokba sülen Myanmar nung tesem ajaklen rara tenzük.

Mitkari kumtetba sorkari par anemer kübok aliba tesemtem nung teyari magütsüi nokdangba ajanga menoknok nungi jenburtem kanga tim atemer, ta osangbeneri ashir.

Menoknok anokba sülen mitkar temi 120 ben amakba osang lir, ta Shamdasani-i ashi.

"Item tatalokba ya tesadang ka dak tema ceasefire

China-i meyiper US oset nung tariff shilem 125 meshitsü

Beijing, Rongchii/April 11 (Agencies): Hokulbarnü China-i US nungi bener aruba oset nung tariff shilem 125 meshitsü sangdongogo, anungji US Tir Donald Trump-i China nunger oset nung tariff meshiba den sako akumer.

China-i US nunger oset nung tariffs temlokba - shilem 84 aliba nungi 125 akumba - ya April 12 nungi kongshitsü. Ajisiüaka Beijing-i iba dang tali temloksü tebilemba mali ta shiogo.

"US-i tanen makai tariffs tali meshi yonga, ibaji ajanga rongsenketzüng tsütsü kecha balaka malitsü aser alima rongsenketzüng otsü nung asayamenü ka akumtsü," ta Finance Ministry ajanga ashi.

US Tir Donald Trump-i China nungi bener aruba oset nung tariffs shilem 145 meshiba sülen Beijing-ia saru tasen ya meshir, aser iba yongji alima nung rongsenketzüng tsütsü jenjang tulutiba linük ana tsüngta 'trade war' tali tamajungba akumer.

"US-i China dang tariffs kanga tali meshiba yagi international aser economic trade rules, basic economic laws nung aibelener aser ibai linük ka kisüng mulung agi

mesüshiba map aka lir," ta Chinese finance ministry ajanga ashi.

Bodhbarnü Trump-i China nunger oset nung tariff shilem 125 meshitsü sangdonga liasü. Yangji tayang kepzüka China-i US nungi bener aruba oset nung tariffs shilem 84 meshitsü sangdong.

Mapang tatsüka lir White House ajanga tang sangdongba shilem 125 ya tang meshia aliba tariff shilem 20 nung bendenloksü ta jangjashitsü, koba fentanyl supply chain nung China shilem lir ta tai tonglokja meshiba lir, anungji tariff ajak agi shilem 145 akumer.

China Tir Xi Jinping-i European Union dang linük ka kijai mulungba nung mesüshiba anema nokdaksü asoshi Beijing den külemi nokdaksü ajungshia liasü.

"China aser Europe nati international khuret bena aser külemi 'unilateral bullying' inyakyim anema nokdaksüla," ta China Tir Xi Jinping-i Beijing nung Spain Ato Kilonser Pedro Sanchez den senden ka amendang ashi.

Iba ama teka amteper inyakba ajanga China aser Europe temeden aser tejangraba kumzüka ayuba nung yaritsü aser "international

fairness and justice" wazüka ayutsü, ta China leniri ashi.

Senden alidang Xi-isa US tariff nungi par linük kumzüka ayutsü nangzüka United States den trade war tesashiba akumba atema China tsüboa mali ta ashi.

"Trade war nung takoker mali, aser alima tejangraba anema aor aser pei sasa pei azüngmeyaka akumtsü," ta Xi-i Hokulbarnü ashi.

Tang US aser China tsüngta trade war aliba mechi global market nung timtem tulu adoka US stock market puti otsü nung takoksa tesashitiba anogo ana ajurua liasü.

China ya European aser Asian linüktem den tesendaktep tajungba akumtsü meranger, koba US-i tariff meshiba langzüa lungjemer nokdaksü nükjidong ka amai ajiteter.

United States anema Beijing den külemi nokdaksü European Union dang ayongzüka den külemi China tir ya ano Vietnam, Malaysia aser Cambodia ama kidanger linük den rongsenketzüng tsütsü tesendaktep tajungba kuma yanglushitsü meranger.

Pai küm tenzüker tang mezüngbuba Southeast Asian linük asem ya sema taruba hopta jajatsü sentong lir.

UK-i Ukraine nem mitkar teyari sen £450 million agütsütsü

Brussels, Rongchii/April 11 (Agencies): UK aser Germany nati Brussels nung linük 50 senden ka ayongzüka mapang UK sorkari Kyiv nem ano miktar teyari sen £450 million agütsütsü sangdongogo.

Russia Tir Vladimir Putin-i Ukraine amakba anendaksütsü asoshi ajungshitsü atema defence ketdangsürtem jateper, ta UK Defence Secretary John Healey-i ashi.

"Russia-i tashiyim amshiba nung tetsükdaksü agütsütsü mechi asenoki maneni Ukraine indang defences tashi itdaksütsüla," ta pai ashi.

UK-i tang tesüsa teyari agütsütsü sangdongba yagi drones aser anti-tanks mines meyirijang aika alitettsü aser mitkar indang garitem yanglushitsü. UK ajanga sen £350m shi agütsütsü aser Norway-ia talila teyari ya UK-i aniba International Fund for Ukraine ajanga agütsütsü.

Iba package nungya UK-i taoba mapang Ukraine nem agüja aliba gari aser hadir yanglushitsü aser anepalutsü atema sen £160m dena lir.

Iba package nungya radar systems, anti-tank mines aser drones meyirijang aika atema sen £250m dak tema lir, ta UK sorkari ashi.

Ukraine ya akok tashi tajungtiba jenjang nung yutsütsü atema telok mapa ya tongtipang lir ta Healey-i ashi.

"Asenoki rara amadoker yimjung meraksatsütsüla, aser iba yongji tanü tongtipang

package yagi Ukraine front-line nung raraba tali yaritsü," ta pai ashi.

Brussels nung Ukraine Defence Contact Group indang senden ka nung jembidang, "Ukraine nung rara atema 2025 ya tongtipang küm ka lir, aser ibai tongtipang mapang ka lir," ta Healey-i ashi.

"Defence minister tem ama asen mapa ya Ukraine nunger rarar kabu nung tekeratiba nung military aid agütsütsü ya lir."

Pai senden nung danga linüktem dang akok tashi nenoki kechi inyaktettsü ta reprangtsü ajungshia liasü.

Taoba ita London nung European lenirtem den senden ka amenba sülen UK Ato Kilonser Sir Keir Starmer-i Ukraine atema £1.6bn missile tezüngzüktep ka sangdonga liasü, aser aji masü dang Russia nunger rongsen soita ayuba nungi tajangzük anguba densema mitkar teyari atema sen £2.2bn aputsü.

Hokulbarnü Ukraine Defence Contact Group senden ka Healey aser German Defence Minister Boris Pistorius lenisüba nung amener, koba January ita Donald Trump tir makum tashi US defence secretary lenisüba nung mena liasü.

Ajisiüaka European security nungi US ainshiba temaitsü ka ama Healey-i iba telok mendenpuba mapa inyaker.

Ajisiüaka Hokulbarnü senden nung US Defence Secretary Pete Hegseth aser Ukraine Tir

Volodymyr Zelenskyy virtual yimya nung adentsü, ta Healey-i ashi.

Trump-i ghonda 24 majungdang Ukraine nung rara tatem kati arudaksütsü ta shia liasü, saka tang tashinung pai iba rara anendaksütsü merangba nung takok kangabo mali.

March ita Trump-i tekeraba nung ita ka ceasefire alitsü ayongzüka Putin-i magizük, koba Kyiv-ibo mulunga liasü.

Takok kangabo meliaka US-i ceasefire asoshi jembishinü manener amai ajiteter. Trump indang special envoy Steve Witkoff Hokulbarnü Russia-i aru, kong pai Putin ajurutsü.

Kasa mapang Ukraine aser Russian sepaitem tsüngta raraba taoba hopta tesashiba akum, ta Ukraine mitkar lenirtemi ashir aser front line nung raraba shilem 30 agi tali kumogo ta ashir.

Brehostibar aonunga Russia-i Ukraine dak drones amshia amakdang Kharkiv region nung nisung pezü yiru, ta regional governor-i ashi.

Ukraine nungi aruba drones tem Kursk aser Belgorod region tem nung khazüka yok, ta Russian state media ajanga ashi.

Zelenskyy-i tang mezüngbuba yimjak nung par sepaitem Ukraine den arütsüa aliba Russia indang Belgorod region nung lir, ta hopta tetenzüklen shia liasü. Ukraine sepaitem ya Russia indang Kursk region nunga rara arutar, ajisiüaka Russia-i alinük timba tanaben agiogo.

Salah-i Liverpool den tenangzüktepba yaglushiogo



Rongchii/April 11, 2025

(Agencies): Egypt nunger forward Mohamed Salah-i Liverpool den küm ana atema tenangzüktepba yanglushiogo.

Pa den tenangzüktepba yanglur aliba taküm lemluwa tembangtsü liasü aser arishi küm 32 tain asayar yagi taoba mapang pa tebilemba lemsatepba aser pa Saudi Arabia-i aotsü atema sendaktepa aliba ajanga club den tenangzüktepba meyanglushitsü akok ta bilema aruogo.

Ajisüaka pai tang tenangzüktepba yanglushiogo aser club nungi asaya 394 nung goal 243 idaktsüba den assist 109 sütsür aliba ya tajungba küma yanglushitsü maongka ngutetogo.

"Hau ni kanga pelar-tang onok team kanga tajung lir," ta Salah-i ashi.

"Taoba mapanga onok team tajung liasü. Ajisüaka onoki tanga takok maroka abentsü

maongka lir ta bilemba aser ni jangradema asayaba ajanga ni tenangzüktepba yanglushiogo.

"Ni idaki küm ti asayaogo aser 10 asayatsü imlar. Ni idakai jangradema alir aser jangradema football asayar," ta Salah-i ashi.

Salah-i tang asaya aliba season nung tetoktepba ajak nung goal 32 idaktsüogo, kong Premier League nung goal 27 idaktsüba densema lir. Asaya tenet asayatsü anunga lia Liverpool pur PL nung tanabuba jenjang nung aliba Arsenal dang nungi point 11 agi timba lir.

Salah, shiba 2017 küm Roma nungi Liverpool nung dena liasü, pai club tenüng nungi asayaba mapang Champions League, Premier League, FA Cup, League Cup aser Fifa Club World Cup nunger ajak kokogo.

Pa ya Liverpool nung tongtiban asayar right-back Trent Alexander-Arnold aser centre-back Virgil van Dijk na den taküm lemluwa contract

tembangtsü aliba asayar asem rongnung ka liasü.

Netherlands defender Van Dijk-i ashiba agi, tenangzüktepba yanglushitsü atema sensaksem tenzükogo, ajisüaka Alexander-Arnold bo Real Madrid-i aotsü atema sendaktepa arudar.

Taoba mapang Salah tenangzüktepba kübok pa nem hopta nung £350,000 agüja liasü aser iba ajanga pa club nung sen timtiba aazükba asayar aküm. Tenangzüktepba tasenba nung pa taa ajemtsüba indang kecha sensaksema mali ta amanger.

Pa club nung tarutsü mejangjai liaka, Salah atema tang asaya aliba season ya season tajungtiba rongnung tanabuba lir. Asaya tenet asayatsü anunga lia pai goal 32 idaktsütettsü akok koba pai mezüngbuba küm idakja liasü.

September ita Sky Sports den sensaksema mapang pai, iba season ya pa atema Anfield nung tatembangbuba season asütsü, kechiyong club nung shingaia pa den contract tasen indang mejembir ta ashi.

Iba sülen ita ana lir Southampton akokba sülen Salah-i, pa nem Liverpool-i contract tasen magütsüba atema pa tezüadanger aser pa ya joko club tetoktsülen tuluba kümogo, ta ashi.

Pa Saudi Arabia-i aotsü atema sendaktepa aruogo aser 2023 küm Al-Ittihad-i Salah atema pound million 150 agütsüba Liverpool-i magizük.

Conmebol-i 2030 World Cup nung team 64 asayatsü benokdang

Rongchii/April 11, 2025

(Agencies): 2030 tebur World Cup nung team 64 asayatsü atema South American governing body Conmebol-i officially benokogo.

Iba asayamung ya Spain, Morocco aser Portugal nung ayongzüka asayatsü aser Argentina, Paraguay aser Uruguay nunga asayamung tetenzüklen asaya kar asayatsü.

2026 World Cup nung tang mezüngbuba team 48 asayatsü ajisüaka Conmebol-i iba asayamung tenzükler küm 100 ajungba nüngdem nung 2030 küm team timba bendenloka asayaner.

"Iba ajanga linük ajak nem WC nung asayatsü atema maongka agütsütsü aser alima nung shinga sentoka metoktsütsü," ta Conmebol tir Alejandro Dominguez-i Bhehostibarnü senden nung ashi.

"Centennial benjugmung ya balaka asütsü, kechiyong küm 100 ya khien dang amunger."

Iba tebilemdangba ya mezüng March ita Fifa Council senden nung Uruguayan Football Federation tir Ignacio

Alonso-i benoka liasü.

Hokolbarnü sangdong ka ajanga Fifa-i ashiba agi, parnok mapaji Council member temi benokba onük asadangtsü asoshi lir.

Fifa tir Gianni Infantino, shiba Bhehostibarnü Conmebol Congress nung dena liasü, pai 2030 küm asayamung ya alizüing tasen ka tongtetba asütsü ta shia liasü.

2026 World Cup nung team 48 asayatsütsü atema 2017 küm Fifa congress nung vote agitepba sülen ajaki mulunga agizüka liasü.

75buba Fifa congress ya Paraguay nung May 15 nü amentsü aser iba mapang Conmebol-i benokba ya asadangtsü akok.

Iba tebilemba ya agizükra 2030 küm asaya 128 asayatsü, koba 1998 nungi 2022 tashi asaya 64 dang asaya aruogo.

Ajisüaka iba ya ajakibo magizükler aser Uefa tir Aleksander Ceferin-i, iba ita tetenzüklen iba tebilemdangba ya majung ta shiogo.

2030 World Cup ya tang mezüngbuba continent asem nung asayatsü lir.

India tetsür hockey team Australia nung oa asaya 5 asayatsü

Rongchii/April 11, 2025

(Agencies): India tetsür hockey team April 26 nungi May 4 tsüingda Australia nung oa asaya pongu asayatsü, ta Hockey India-i Bhehostibarnü metetdaktsü.

India team mezüngbuba asaya ana Australia A den asayatsü aser iba sülen senior Australian team den asaya asem asayatsü.

April 26 aser 27 nü atonga Australia A den asaya ana asaya-a asayamung tenzüktsü, aser iba sülen world No.5 senior Australian team den May 1, 3 aser 4 nü asaya asem asayatsü renema lir.

Asaya ajak ya Perth Hockey Stadium nung dang asayatsü.

Iba asayamung ya FIH Pro League 2024-25 atema European leg metenzük tsüingda India team asoshi renemshitsü atema maongka tajung ka asütsü. FIH Pro League European leg ya June ita tenzüktsü.

World No.1 Netherlands den goal 2-2 agüja draw süa bonus point anguba sülen jenjang 9buba nung aliba India team ya

tang parnok dak kanga temulunglemteta aliba mapang ka nung iba asayamung asayatsü lir.

Kasa mapang nung India team-i tawa Australia team dena kokogo. FIH Pro League 2023-24 nung India aser Australia na asayaba mapang India-i goal 1-0 agi Australia koka liasü.

Ajisüaka asaya puti otsü reprangdangra 2013 küm nungi tang tashi nung Australia-i India den asaya 16 nungi 10 bo koker lir. India-i asaya asem akok aser asaya asem draw süa liasü.

Iba asayamung indang jembiba mapang India head coach Harendra Singh-i, "FIH Pro League European leg atema renemshiba mapang iba asayamung ya kanga tongtiban asütsü. Australia amala team tajung ka den asayaba ajanga asenok asayatem tendangtsü aser asen jenjang jangjatsü.

"Australia den teti kanga toktepa asaya aruogo aser parnoki asaya timba koker liaka tawa asenokia parnok den toktepa asayatetba sayuogo," ta ashi.

Gaikwad yiruba sülen Dhoni CSK captain kümogo

Rongchii/April 25, 2025

(Agencies): Ruturaj Gaikwad tekatsüla yiruba sülen MS Dhoni lenisüba nung Chennai Super Kings pur tang asaya aliba Indian Premier League nung tanungba asayatem asayatsü.

Arishi küm 42 tain asayar yagi iba team ya 2008 nungi 2024 küm tashi ania liasü aser iba mapang parnoki IPL ponguben kokogo.

Honibarnü Delhi Capitals makokba asaya nung Dhoni'er tsürapurtem arua adenba sülen pa asaya nungi anentsü akok ta bilema liasü.

Ajisüaka pai tang club captain mapa agizükogo. CSK puri tang asaya aliba season nung mezüngbuba asaya pongu nung ka dang koka lir aser team 10 rongnung parnok tekububa nung lir.

Taküm Dhoni indang batting averaging 51.50 lir. Pa asaya asem tashi nung out mesüi asaya lir aser pai asaya ana nung run 30 dak tema yanglur lir.

CSK head coach Stephen Fleming-i ashiba agi, Dhoni shiba mapang ka nungbo iba



Ruturaj Gaikwad

asaya nung finisher tajungtiba ta züingshia liasü, pa temekok nung tebilemtsü aliba ajanga over 10 dak tema batting mementeter.

Dhoni 2020 küm international asaya nungi anena liasü. India tenüng nungi pai Test 90, one-day internationals 350 aser T20 98 nung asaya liasü.

India-i 2011 küm kidang World Cup akokba asaya nung pai tatembangbuba run yanglu aser pa lenisüba nung India team-i 2007 T20 world Cup aser 2013 Champions Trophy koka liasü.

Iba sülen pa IPL nung CSK atema maneni asaya arudar aser pa lenisüba nung parnoki IPL ponguben kokogo.

Kasa mapang nung Gaikwad ya March 30 nü Rajasthan Royals den asayaba mapang Tushar Deshpande-i ball aondang tekatsüla yirua liasü, ajisüaka pai maneni asaya-a iba asaya nung run 63 yanglu.

Iba sülen arishi küm 28 tain asayar yagi asaya ana nung run 10 adena meyanglutet aser tang season nung tanungba asayatem nung masayatettsüa kümogo.

BILEMDANGANG

**"Nü mulung melenshitetra
nü taküm melenshitettsü."**